
ՊԱՐՈՒՅՐ ՍԵՎԱԿԻ ԲԱՆԱԳԻՏԱԿԱՆ ՀԱՅԱՑՔՆԵՐԸ

ԱՐՄԵՆ ՍԱՐԳՍՅԱՆ

Պարույր Սևակը, որ լավագույնս յուրացրել էր հայ բանավոր ավանդության և գրականության հարուստ ժառանգությունը, չեղ կարող չտեսնել ու չգնահատել ժողովրդական բանահյուսության վիթխարի դերը թե՝ մեր ժողովրդի բազմադարյա պատմության, թե՝ գեղարվեստական գրականության զարգացման գործընթացում:

«Բանահյուսությունն ունի իր անկրկնելի հմայքն ու հարստությունը: Եվ ամեն ազգի գրող էլ, ծնվելով և մինչև մեռնելը, օգտվում է դրանից, ինչպես օդից...»¹. այսպես էր Պարույր Սևակը արժեքավորում ժողովրդական բանարվեստի դերն ու նշանակությունը, յուրաքանչյուր գրողի կյանքում:

Այս գնահատականը բխում էր Սևակի ստեղծագործական դաշտանքից, բանզի նրա ողջ գրական ժառանգությունը տեսանելի և անտեսանելի թելերով շաղկապված է ժողովրդի համազգային ավանդների հետ:

Սևակը նորարար բանաստեղծ էր, և բանահյուսության հանդեպ իր վերաբերմունքով ևս պետք է արտահայտվեին ժամանակի պահանջներից բխող նրա նորովի մոտեցումներն ու գնահատման չափանիշները՝ աչքի առաջ ունենալով, անշուշտ, իր և զայիր ժամանակների զարգացած ընթերցողի ճաշակն ու մտածողությունը:

Պարույր Սևակի ստեղծագործական մուտքը նշանավորող «Սուտք» խորագրով ժողովածուն սեակագետներին հետաքրքիր նյութ էր տրամադրում՝ բացահայտելու պոեզիայի բարձունքները նվաճելու բանաստեղծի անկոտրում կամքն ու աներեր հավատամբը.

Պիտի իմ երգը ծնվի կյանքի մեջ,
Կյանքի գրկի մեջ... Կյանքից գոյացած
Պիտի որ դառնամ կյանքի բանաստեղծ,
Կյանքի զորությամբ բարձր խոյացած²:

Ժամանակի շունչը դառնալու չարենցյան պատճամին հավատարիմ մնալու հաստատակամության հետ վաղ շրջանի գործերում արդեն իսկ պարզորդ նկատելի է երիտասարդ բանաստեղծի հակումներն ու հստակ դիրքորոշումը

¹ Պ. Սևակ. Երկերի ժողովածու (6 հատորով), կազմող՝ Ա. Արիստակեսյան. հ. V, Երևան, 1974, էջ 260: Կատարվող մեջբերումների աղյուրները պատկենուն նշվելու են բնագրում:

² Պ. Սևակ. Սուտք. Երևան, 1985, էջ 37:

ազգային ավանդների, մասնավորապես՝ ժողովրդական բանահյուսության ու դիցաբանության հանդեպ:

«Սուտք» ժողովածուի հրատարակության կապակցությամբ գրած գրախոսականում գրականագետ Ս. Սարինյանը, ընդգծելով երիտասարդ բանաստեղծի իմացության շրջանակների լայնությունն ու խորքը, մատնանշում է նաև այն աղերսները, որ առկա են Պարույր Սևակի վաղ շրջանի գործերի և հայ ու համաշխարհային գրականության, ժողովրդական բանահյուսության և դիցաբանության միջև. «Ինքնին արդեն ուշագրավ է, թե ստեղծագործական մուտքը նշանավորող ներկա մատյանում Սևակը ինչպիսի շառավիղների վրա է գծում իր իմացությունների սահմանը, ի հայութեառում խորունկ թափանցումներ հայ և համաշխարհային գրականության ու դիցաբանության ոլորտներում... «Լուսին» պոեսի պոետիկայում միանգամայն տեսանելի են և՝ նարեկացիական շրջադասությունների, և՝ թումանյանական էպիզուդների, և՝ չարենցյան դեկլարացիայի, և՝ մեր ազգային վիպերգի կրկնապատումների ոճական նստվածքները...»³:

Պարույր Սևակի բանագիտական հայացքների ձևավորմանը մեծապես նպաստել է ուսումնառության տարիներին գրական արժեքների մեջ մինչև վերջ խորամուխ լինելու և նրանց ակունքների հետ հաղորդակցվելու ձգուումը:

Բանագիտական խնդիրներին Պ. Սևակը առաջին անգամ առնչվել է առաջին կուրսի վերջում՝ 1941թ., երբ տակավին գրական կեղծանուն չստացած Պարույր Ղազարյանը Հ. Դավթյանի հետ մի գրախոսական է գրում՝ նվիրված Արամ Ղանալանյանի «Արովյանը և ժողովրդական բանահյուսությունը»⁴ գրքին:

Գրախոսների կողմից վաստակաշատ բանագետի աշխատանքը գնահատվում է նախ իբրև արովյանագիտության մեջ արված լավագույն ներդրում, ապա այն քննարկվում է գրողի և ժողովրդական բանահյուսության միջև գոյություն ունեցող կապի ուսումնասիրության տեսանկյունից:

Այնուհետև մանրամասն ներկայացնելով կատարված հսկայածավալ աշխատանքը՝ հեղինակներն անդրադարձել են բանագիտության մեջ Արովյանի գրական ողջ ժառանգության դանալանյանական գնահատականներին (առաջին հայ բանահավաք և բանագետ, ժողովրդական բանարվեստի օգտագործման զանազան ձևեր՝ մշակումներ, թարգմանություն-փոխադրություններ և ժողովրդականի նմանությամբ գրված հեղինակային ստեղծագործություններ, բանահյուսական տարրեր ժանրերի գործածություն և այլն):

Համալսարանական տարիներին ստեղծագործական առաջին լուրջ քայլերն անելուն գուգահեռ Պ. Սևակը ՈՒԳՀ նստաշրջաններում գեկուցումներ է կարդում «Նաիրի Զարյանի պոեզիան Հայրենական պատերազմի տարիներին»

³ Ս. Ս ա ր ի ն յ ա ն. Բանաստեղծի հայտնությունը.՝ «Գրական թերթ», 5.07.1985:

⁴ Պ. Դ ա զ ա ր յ ա ն, Հ. Դ ա վ թ յ ա ն. Գրախոսական Արամ Ղանալանյանի «Արովյանը և ժողովրդական բանահյուսությունը» (Երևան, Արմֆան) գրքի.՝ «Սովետական դպրոց», 12.06.1941:

(1943թ.), «Վահագն Դավթյանի բանաստեղծությունները» (1944 թ.), «Դանիել Վարուժանի պոեզիան» (02.1945թ.) թեմաներով: Վերջինս, ճիշտ է, ինչ-ինչ պատճառներով չի կարդում, սակայն հետազայում այն խորացնելով՝ դարձնում է իր դիպլոմային ավարտաձառը:

Խոստումնալից բանաստեղծը գրականագիտական գեկույց-ուսումնասիրություններում նույնպես համարձակ ու հիմնավոր տեսակետներ է արտահայտում, անդրադառնում նաև գրողի և ժողովրդական բանահյուսության փոխառնչության հարցերին՝ իր վրա բնեռելով բանաստեղծական և գիտական աշխարհի մեծերի ուշադրությունը:

Դ. Սևակի բանագիտական հայացքներն առավել հստակությամբ են դրսելուրվել նրա՝ «Դանիել Վարուժանի պոեզիան» ուսումնասիրության մեջ, ուր գրականագիտական վերլուծության հետ միասին հեղինակն անդրադարձել է նաև Վարուժանի պոեզիայի և ժողովրդական բանավոր ստեղծագործությունների առնչության հարցերին, բացահայտել այն կապերը, որոնք նկատելի են նրա ստեղծագործությունների և ժողովրդական բանահյուսության միջև:

Այս տեսանկյունից հարցը քննելիս Պ. Սևակը կանգ է առնում Դանիել Վարուժանի «Հացին երգը» շարքի վրա, մատնանշում հայ ժողովրդական աշխատանքային երգերի ու Վարուժանի հացերգության միջև գոյություն ունեցող ներքին (երբեմն տեսանելի, երբեմն՝ անտեսանելի) կապը. «Ստեղծագործության նյութ դարձնելով հայ շինականին, նրա բեղմնավոր աշխատանքը, նրա հերկն ու ցանք, նրա հունձքն ու կալք, բնականաբար, Վարուժանը չկը կարող աչքի տակ չունենալ հենց այդ շինականի բանավոր ստեղծագործության, ֆոլկլորի, հատկապես նրա աշխատանքային երգերի փորձը» (V, 366):

«Հացին երգը» շարքում ժողովրդական բանարվեստի հանդեպ վարուժանյան մոտեցումը Սևակը դիտարկում էր երկու տեսանկյունից՝ անմիջական և միջնորդավորված: Ընդ որում, «Յորյանի ծովեր», «Հունձք կը ժողվեմ», «Կամերգ», «Օրինություն» և էլի մի բանի գործերի մեջ Պարույր Սևակը տեսնում է բանահյուսության անմիջական, ուժեղ ազդեցությունը՝ գրված «ժողովրդական պոետիկայի օրենքներով»: Իսկ «Աղորիքը», «Ճարակումը», «Յանը», «Մշակները» և այլ գործեր, որոնք, երիտասարդ վերլուծարանի բառերով ասած, «առավելապես հեղինակային խոսքեր են, քան բանաստեղծական նկարագրեր, նրանց վրա անզամ զգացվում է ֆոլկլորային պարզունակ ոճը, խրթնաբանության իսպառ բացակայությունը», այսինքն՝ բանահյուսության ազդեցությունն առկա է միջնորդաբար:

Վարուժանի ստեղծագործությունները քննելիս Պ. Սևակը հաշվի է առնում գրականության առաջընթացը պայմանավորող մի շատ կարևոր հանգամանք ևս, թե կոնկրետից դեպքի վերացականը, մասնավորից ընդհանուրը և ազգայինից միջազգայինը գնալու ձանապարհին բանաստեղծը կարողանում է արդյոք «ինչ»-ի և «ինչպես»-ի բովանդակության և ձևի ներդաշնակ համաձայնվածքով հասնել այն բանին, որ անհատական՝ անձնական, ազգային ապրումը վերածի հասարակական, համազային ապրումի, և դրան հասնելու համար որ-

քանո՞վ են նպաստում բանահյուսական ստեղծագործությունների անմիջական և միջնորդավորված ազդեցության դրսերումները:

Մանրակրկիտ և բազմակողմանի վերլուծությունն ու բանագիտական դիտողականությունն օգնում են Պ. Սևակին՝ հանգելու միանգամայն ճշմարիտ հետևողականության։ «Եյութք ինքնին իրենով պայմանավորում է ձևը, ֆորման։ Թեմայի հարցը նաև ձևի հարց է։ Եվ այդ իմաստով էլ, – շարունակում է Սևակը, – Վարուժանի ընտրած նյութն ու թեման տվյալ դեպքում հարկադրաբար թելադրում են այսօրինակ ձևի կիրառում և ոչ, ասենք, այնպիսի վերամբարձ ոճ, ինչպես «Հեթանոս երգեր» ցիկլում, կամ այնպիսի հզոր ու մարտական շունչ, ինչպես «Գողգոթայի ծաղիկներ»-ում կամ «Յեղին սրտի» համապատասխան կտորներում» (VI, 1976, 366):

Ուսանողական տարիների գրական ու գիտական ակտիվ գործունեությունը, գրական քննարկումների և զանազան գիտական նստաշրջանների ժամանակ արծարծած հարցերի խորքայնությունն ու համարձակ դիտարկումները մեծապես նպաստում են, որ համալսարանն ավարտելուց անմիջապես հետո Պ. Սևակը դառնա ՀԽՍՀ ԳԱ գրականության ինստիտուտի ասպիրանտ՝ հայոց հին և միջնադարյան գրականություն մասնագիտությամբ։

Նրա գիտական դեկավարն է դառնում եվրոպական հիմնավոր կրթություն ստացած, մարդկային բարձր արժանիքներով օժտված պրոֆ. Կարապետ Մելիք-Օհանջանյանը։ Գերմանիայում կրթված դեկավարը «պարբերաբար գրականությունն էր հանձնարարում ասպիրանտին և գերմանական ճշտապահությամբ պահանջում ներկայանալ ու հաշիվ տալ կարդացածի մասին։ Եվ Պարույրը ենթարկվում էր անմոռունց։ Ասեմ, որ գիտական դեկավարի և ասպիրանտի այդպիսի փոխհարաբերություն են այնս չեմ տեսել...»⁵, – գրում է այդ օրերի մասին իր հուշերում Լևոն Հակոբերյանը։

Բազմավաստակ գիտնական, բանահավաք-բանագետ Կարապետ Մելիք-Օհանջանյանի հարուստ գիտելիքներն ու խստապահանջությունը մեծ դեր են խաղում Պ. Սևակ բանաստեղծի ու գիտնականի աշխարհայացքի և մտածողության ձևավարման ուղղությամբ։

Տարիներ անց՝ 1963 թվականին, Կարապետ Մելիք-Օհանջանյանի ծննդյան 70-ամյակի կապակցությամբ գրած իր երախտիքի խոսքում Պարույր Սևակն իրեն հատուկ դիպուկ պատկերներով է ներկայացնում իր ուսուցչապետի դիմանկարն իրքն գիտնականի և մարդու. «...ինքն էլ մի Սասնա ծուռ է, անեղանլուծ գութան քաշող մի Դավիթ... Նրան պարզապես աշակերտելն անկարելի է, պետք է որդեգրվել, ավելին՝ որդիանալ»⁶։

Պ. Սևակը Կարապետ Մելիք-Օհանջանյանին և Մանուկ Աբելյանին դասում է այն եղակի բախտավորների շարքը, որոնց հուշարձանը կանգնեցվում է նրանց իսկ կենդանության օրոք։

Նկատի էր առել էպոսագիտության ասպարեզում կատարած նրանց վիթխարի աշխատանքը. «Քչերն են բախտավորվում՝ իրենց հուշարձանը կենդան-

⁵ Լ. Հ ա ի ւ զ ե ր դ յ ա ն. Պարույրը. Երևան, 1987, էջ 121։

⁶ «Սովետական արվեստ», 1963, №-5, էջ 58։

վույն տեսնելով: Այդ քչերից մեկն էր մեր մշակույթի երախտավոր Մանուկ Արեղյանը: Այդ քչերից է նաև Կարապետ Մելիք-Օհանջանյանը: Եվ մեկն է նրանց հուշարձանը: Ու կոչվում է «Սասնա ծոկը»...»⁷:

Երևանի պետական համալսարանում և ասպիրանտուրայում ուսանելու տարիներին ձեռք բերած գրականագիտական ու բանագիտական հիմնավոր գիտելիքների շնորհիվ Սոսկվայի Գորկու անվան համաշխարհային գրականության ինստիտուտում ուսանելու հենց առաջին տարում՝ 1951 թ. նոյեմբերին, նրան է հանձնարարվում զրել ուժերատ «Գորկին և ժողովրդական բանահյուսությունը» թեմայով:

Տրամադրված սուղ ժամանակն անգամ չի խանգարում Պարույր Սևակին, դասախոսություններից չբացակայելով հանդերձ, ընդամենը մեկ շաբաթվա ընթացքում, հիմնականում աշխատելով զիշերները և «Գորկու ողջ գրական ժառանգությունը «տակնուվա անելով»՝ այնպիսի մի զեկուցում պատրաստել, որ իր բանագիտական համարձակ դիտարկումներով ու հարցադրումներով զարմանք և հիացմունք է պատճառում ներկաներին:

«Գորկին և ժողովրդական բանահյուսությունը» ուժերատը թէ՝ դասախոսները, թէ՝ ուսանողությունը բարձր գնահատականի են արժանացրել՝ համարելով այն թեկնածուական դիսերտացիային համարժեք ուսումնասիրություն⁸:

Ի դեպ, հրատարակված ուսումնասիրություններում, հուշերում և կենսամատենագիտություններում Սոսկվայում կարդացած զեկուցումների շարքում նշվում է Գորկուն նվիրված բանագիտական աշխատության երկու խորագիր՝ «Գորկին և ժողովրդական բանահյուսությունը»⁹ և «Գորկին ժողովրդական երգի հավաքող»¹⁰:

Մ. Գորկու բանագիտական հայացքների բացահայտմանը նվիրված այդ ուսումնասիրությունը (կամ գուցե ուսումնասիրությունները) առ այսօր չի հրատարակվել, իսկ բանաստեղծի անձնական արխիվից օգտվելու հնարավորություն, ցավոք, չունեցանք: Զեռագիրը թերևս օգներ հատակեցնելու և ամրութացնելու մեր պատկերացումը Պարույր Սևակի բանագիտական հայացքների վերաբերյալ:

Քանի որ Ա. Արիստակեսյանն իր մենագրությունը զրելիս օգտագործել է Պ. Սևակի տպագիր ու անտիպ գրական և գիտական զրեթե ողջ ժառանգությունը, ուստի առավել հավաստին, թերևս, նրա բերած փաստերն են¹¹:

⁷ Նույն տեղում, էջ 58:

⁸ Վ. Բ ա թ ա ն. Պարույր Սևակի հետ. Երևան, 1988, էջ 10-11.

⁹ Ա. Վ. Արիստակեսյան. Պարույր Սևակ. Երևան, 1974, էջ 108: Վ. Բ ա թ ա ն. Պարույր Սևակի հետ, էջ 10:

¹⁰ Պ. Ս ե ա կ. Կենսամատենագիտություն (կազմող՝ Ալբերտ Արիստակեսյան). Երևան, 1983, էջ 12:

¹¹ Տարակարձությունների առիթ է տալիս հենց ինքը՝ Արիստակեսյանը՝ 1974 թ. հրատարակած «Պարույր Սևակ» մենագրության մեջ նշելով մի խորագիր, իսկ 1983 թ. կազմած կենսամատենագիտության մեջ՝ մեկ ուրիշը: Ա. Արիստակեսյանի կազմած կենսամատենագիտության մեջ նշվող զեկուցման ժամանակը՝ 1951 թ. նոյեմբերի 21-26-ը, համընկնում է Վարդգես Բարայանի բերած տվյալների հետ, իսկ վերջինիս հուշապատումում ներկայացված փաստը՝ կապված ուժերատին տրված բարձր գնահատականներին, համընկնում է մենա-

Միջնադարյան տաղերգուներին նվիրված իր գրականագիտական մի շարք հոդվածներում և գիտական աշխատություններում Պ. Սևակը բանաստեղծ գիտնականի խորաթափանցությամբ բազմաթիվ գրականագիտական հարցերի հետ անդրադառնում է նաև ժողովրդական լեզվամտածողության և ժողովրդական բառ ու բանի հետ Գր. Նարեկացու, Նահապետ Քոչակի և Սայաթ-Նովայի ստեղծագործությունների առնչության հարցերին:

Նարեկացուն Սևակը համարում էր մեր ամենամեծ նորարարը ոչ միայն լեզվի (գրաբարի և աշխարհաբարի սերտ միահյուսմամբ) ու ձևի (առաջին անգամ հանգ ու չափի կիրառմամբ) հարցում, այլև «...օգտագործմամբ ժողովրդական բանահյուսության, այն «զարեաց բանաստեղծութեան», որ պաշտոնական զարափարախոսությունը համարում էր ոճրագործություն և անառակություն» (Վ, 246):

Քանի որ գուսանական-աշուղական երգերը՝ իրքի անհատական ստեղծագործություններ, անքակտելիորեն կապված են ժողովրդական բանարվեստի հետ, Պ. Սևակն իր հոդված-ուսումնասիրություններում դրանց անդրադառնալիս խոսում է նաև այդ ստեղծագործությունների և ժողովրդական բանահյուսության ու դիցարանության փոխառնչության հարցերի մասին: Նա համոզիչ փաստարկներով առանձնացնում է գուսան և աշուղ հասկացությունները՝ աշուղը, աշուղական արվեստը համարելով միջնադարում արևելյան ժողովուրդներից հայերին անցած արժեքներ, իսկ հանգը՝ եկամուտ շերտ:

Հայ իրականության մեջ գուսանական արվեստը աշուղականով փոխարինելը և ազատ չափով բանաստեղծությունը արևելյան հանգին ենթարկելը Պ. Սևակը համարում էր նահանջ:

«Արևելքը, (ասում էր Պարույր Սևակը, (գուցե և ինչ-որ երանգ տվել է մեր մշակույթին, բայց և զգալի չափով հասարակացրել է այն, մեր գողթան երգերը իշեցրել է ջանգուլումների մակարդակին, գուսաններին փոխարինել է աշուղ-ներով, Նարեկացու բանաստեղծական մտածողությունը ենթարկել է արևելյան հանգի: Սա կորուստ էր...»¹²:

Պ. Սևակի պրատուն միտքը վերլուծում է երկրորդ հազարամյակում մեր նվաճումներն ու կորուստները և հայ ժողովրդի ազգային զարթոնքն ու ձեռքբերումները կապում ուսական բաղաքակրթության բարերար ազդեցության հետ, որի շնորհիվ արվեստի և մշակույթի մի շարք բնագավառներ սկսեցին «եկամուտ շերտերից» մաքրվել և աշխարհին ներկայանալ մեր իսկ ինքնատիպ դիմագծերով. «Զանդես եկան մի Կոմիտաս, մի Թորամանյան, մի Աճառյան, մի Տերյան, մի Վարուժան, մի Աբեղյան և ձեռնամուխ եղան հայ լեզուն, երաժշտությունը, ձարտարապետությունը, բանահյուսությունը, բանաստեղծություն-

զրության մեջ Արիստակեսյանի ներկայացրած փաստարկներին: Զնայած վերջինիս մեջ, բառ ժամանակագրության, «Գորկին և ժողովրդական բանահյուսությունը» ռեֆերատը հաջորդում է «Հիպերբոլան Մայակովսկու «Վարտիքավոր ամպը» պոեմում» (1954 թ.) զեկուցմանը: Ձեռքի տակ եղած փաստերը թույլ են տալիս ենթադրել, որ Ս. Գորկուն վերաբերող ռեֆերատի երկու խորագրերն ել պատկանում են միևնույն ռեֆերատին:

¹² Ս. Սար ի ն յ ա ն. Պարույր Սևակը գուզահեռի վրա.- «Գարուն», 1981, №-11, էջ 54:

նը եկամուտ շերտերից մաքրելու, տոհմիկ հայկականը վերականգնելու գործին...»¹³:

Երբ 1957 թ. հրատարակվում է գրականագետ Ավ. Ղուկասյանի կազմած «Հայրենի կարգավ»¹⁴ ժողովածուն, Պ. Սևակն անմիջապես արձագանքում է դրան՝ գրելով «Հանճարեղ սիրերգեր» հոդված-գրահուսականը:

Գնահատելով Ավ. Ղուկասյանի կատարած շնորհակալ աշխատանքը՝ բանաստեղծը զիտականորեն հերքում է զրբի առաջարանում և ծանոթագրություններում տեղ գտած մի քանի սիսալ տեսակետներ:

Սևակն իր դժգոհությունն է հայտնում հեղինակի՝ առանց փաստարկների, չիմնավորված որոշ հայտարարությունների կապակցությամբ, թե «հայտնի է, որ Քուչակից առաջ հայ իրականության մեջ աշուղներ չեն եղել»:

«Ամենից առաջ, (գրում է Պ. Սևակը, (որտեղից է հայտնի, եթե հայտնի է, ինչո՞ւ ընթերցողին հայտնի չդարձնել» (V, 36-37):

Եթե Սևակն էլ վարվեր Ավ. Ղուկասյանի նման, պետք է այդքանով ավարտեր իր քննադատությունն ու հերքումը: Բայց նա զիտականորեն հիմնավորում է իր տեսակետը՝ բերելով աշուղական արվեստին բնորոշ մի շարք հատկանիշներ, որոնք ոչ մի կապ չունեն քուչակյան հայրենների հետ: «Բացի դրանից, շարունակում է իր ասելիքը հիմնավորել Պ. Սևակը, (եթե հեղինակը տարբերակում է «զուսան» և «աշուղ» արտահայտությունները, ապա գոնե չպիտի մոռանար «աշուղի» համար շատ դեպքերում պարտադիր այնպիսի հարցեր, ինչպիսիք են աշուղի գրագետ կամ անգրագետ լինելը, երգելն ու նվագելը, տաղաչափական յուրօրինակ չափերով հորինելը, երգերի մեջ (մեծ մասսամբ վերջում) իր անվան հիշատակումը: Ինչո՞ւ են քուչակյան հայրենները կամ պատմական փաստերը հայտնի դարձնում այդ «հայտնին» (V, 36-37):

Գրահուսականում գրականագիտական և բանագիտական հարցադրումները և նրանցից բխող պատասխաններն այնպես սերտորեն են շաղախիված, ինչպես հայրեններում անհատականը ժողովրդականի հետ:

Սևակը մերժում է Ավ. Ղուկասյանի «հայրեն» բառի թյուր սոսուզարանությունը, որ վերջինս նույնացրել է «հայրենիք» բառին՝ կապելով այն XV-XVI դարերում սկիզբ առած պանդխտության հետ:

Կրկին անզամ հաստատելով Մ. Աբեղյանի և Կ. Կոստանյանի տեսակետները միայն հայ բանարվեստին հասուլ «հայրենի կարգաւ» ուսանավորի չափի կապակցությամբ՝ Պ. Սևակը իրքի ապացույց մեջքերում է Ֆրիկի «ուր են քո ամեն բաներն հայերեն, մասալ ու առակ» և «շատ մի հայերեն բաներ խորհուրդով դրախտ տնկեցի» արտահայտությունները՝ ժխտելով նաև «Զվարթնոցի, Նարեկացու, Կոսիտասի պես անկրկնելի ու հայկական (զուտ հայկական) «մարգարտե շարոցի» ստեղծման ժամանակաշրջանը XV-XVI դարերում տեղավորելու դուկասյանական վարկածը:

Պ. Սևակը Ավ. Ղուկասյանին քննադատում է նաև որոշ զիտական փաստեր խեղաթյուրելու հայրենները իրք ֆեղալական երգեր ներկայացնելու «արեղ-

¹³ Նույն տեղում:

¹⁴ Հայրենի կարգավ: Ժողովածու, կազմեց Ավ. Ղուկասյանը. Երևան, 1957:

յանական» տեսակետի կապակցությամբ: Այնուհետև, իբրև ապացույց՝ մէջքերում է գուսանների և գուսանական արվեստի վերաբերյալ Մ. Արեղյանի կարծիքը՝ որպես ժողովրդի մարդկանց ստեղծագործություններ՝ հարուստ ժողովրդական կենդանի լեզվի նրբերանգներով, ժողովրդական նիստ ու կացով, վարք ու բարքով, սովորություններով, որոնք «բոլորը երեան են զայիս նաև մեր գյուղական ժողովրդական երգերի մեջ»:

«Եվ այսքանից հետո,(գրում է Սևակը,(հայտարարել, թէ Մ. Արեղյանը հայրենները համարում էր ֆեռդալական երգեր հիմք ընդունելով Արեղյանի այն դիտողությունը, թէ հայրենների մեջ երեան է զայիս նաև հարուստ դասերի կենցաղը... առնվազն փաստերի ճիշտ շարադրանք չէ» (V, 37):

Գուսանների և աշուղների մասին զիտելիքներից զատ, Սևակը հաղորդակցվում է նաև արևելյան ու արևմտյան երկրների ժողովրդական երգիչներին՝ հունական ռապսոդներին, ֆրանսիական տրուքադուրներին, գերմանական մայստերզինգներին, կելտական բարդերին, արևելքի երկրների աշուղներին ու նրանց ստեղծագործությունների առանձնահատկություններին:

Նրանք, սիրահարներ ու սիրերզակներ լինելուց բացի, նաև «ժողովրդի լեզուն ու բերանն էին» մի ժամանակաշրջանում՝ տասը դար տևած միջնադարում, երբ «զսպաշապիկ էր հազցված բոլորի ուղեղին ու մտքին, բայց ոչ սրանց: Փականք էր դրված բոլորի լեզվին ու բերանին, բայց ոչ սրանց»¹⁵:

Պարույր Սևակը քաջածանոթ էր նաև Արևելքի տաղերգուններին, մասնավորապես բանահյուսության հենքի վրա ստեղծված պարսկական միջնադարյան գրականությանը (Ծուղակի, Ֆիրդուսի, Սահադի, Հաֆեզ, Խայամ...):

«Սայաթ-Նովա» ուսումնասիրությունը գրելիս Սևակը հերքում է «Ճիր շաքարի տեղ»՝ հրամցնող որոշ գրականագետների տեսակետները, հատկապես Մ. Նարյանի առաջադրած վարկածը՝ կապված Ապոլլոն-Կարապետ-Շախաթքայի «աստվածներին» հույն, հայ և պարսիկ ժողովուրդների երգերածշտության աստված համարելու հետ: «...այսպիսի վստահությամբ և հեշտությամբ մարդ իրեն թույլ չի տա գրելու նույնիսկ Վահագնի և Անահիտի, Տիրի և Աստողիկի մասին... աստված հո մժե՞ն չէ, որ կորչեր հարդով լեփ-լեցուն մարագում,– իր հեգնապիտառն ու առածատիաց հարցումն է ուղղում հեղինակին Պ. Սևակն ու շարունակում,– եթե եղել է այդպիսի աստված Արևելքում և մեր (հայկական) միջավայրում էլ ճանաչվել է այդպիսին, մի թէ այդ աստծու մասին մի կենտ հիշատակություն չի պահպանվել Արևելքի և հայոց բազմահարուստ գրականության կամ բազմաթիվ ժողովուրդների բանահյուսության մեջ...»¹⁶:

Բացելով սիսալ մէկնարանման պատճառ դարձած «Շատ սիրուն իս, Շախաթքայի ասողին խար չիս անի» տաղի մի շարք գաղտնիքներ՝ Պ. Սևակը հավաստում-ապացուցում է, որ Շախաթքային ոչ թէ երգ-երածշտության աստված է, այլ պարսից Սեֆյան թագավորական հարստության հիմնադիր Շահ Խսմայիլը՝ զահակալած 1502-1524 թվականներին:

¹⁵ Պ. Ս և ա կ. Սայաթ-Նովա. Երևան, 1969, էջ 132:

¹⁶ Նույն տեղում, էջ 426:

«*Ծահ Խսմայիլը, (զրում է Սևակը, (նաև ականավոր բանաստեղծ էր՝ Ծահ Խսմայի կեղծանվամբ, հեղինակը հռչակավոր «Դիվանի», «Դեհնամեխ», «Նասիխաթնամե»-ի¹⁷: Ժխտելով սուրբ Կարապետի և Սպոլոնի՝ երգ-երաժշտության աստված լինելու տեսակետը և ձգրտելով «Ծախսաթայիի» անձը՝ Սևակը չի բավարարվում այդքանով: Նա ծանոթանում է Ծահ Խսմայիի զրական ժառանգությանն ու նրա մասին եղած ուսումնասիրություններին և հետևություն անում, թե նրա ստեղծագործությունները սերտորեն առնչվում են պարսկական ժողովրդական բանահյուսության հետ. «Նա ինքը մեծապես օգտվում էր ժողովրդական բանահյուսությունից և սիրահարն ու հովանավորն էր աշուղների ու աշուղության...»¹⁸:*

Պ. Սևակը հրաշալի էր տիրապետում թե՝ ժողովրդական բանարվեստի զաղտնիքներին, թե՝ նրա հետ կապված աշուղական արվեստի նրբություններին ու նրա ժանրային առանձնահատկություններին: Այդ հիմնավոր իմացությունն էլ բանաստեղծին հնարավորություն էր տալիս հարկ եղած դեպքում անկաշկանդ բանավիճել զրականագետների ու աշուղագետների հետ, մեջբերվող փաստարկներով հաստատել կամ ժխտել ցանկացած քննարկելի հարց՝ առաջ քաշելով զիտականորեն հիմնավորված սեփական տեսակետը:

Այսպես, քննադաստելով Ավ. Շավոտվարյանին՝ թեջնիսը իբրև բանաստեղծական ձևեր մուամմայի ու թարիիսի հետ շփոթելու և սխալ հետևություններ անելու համար, Պ. Սևակը մի քանի հերքող փաստեր բերելուց հետո զրում է. «...Այս ամենին ավելացնենք և այն, որ մուամման և թարիիսը առաջացել ու ծաղկել են 10-15-րդ դարերում, բայց ոչ երբեք 18-րդ դարի կեսերին, ապա և այն, որ դրանք բանաստեղծական ձևեր լինելուց առաջ զուտ սիտլաստիկական մարզանքներ էին, ուստի և անահմանորեն հեռու ժողովրդական-աշուղական ստեղծագործությունից, սրա կենդանի, թրթռուն ոգուց»¹⁹:

Պարույր Սևակը զիտական փաստարկներով ժխտում է նաև զրականագետ Մ. Մկրտչյանի՝ Սայաթ-Նովայի խաղերից մեկի՝ «Ինձ սիրեցիր Եշիլըն ննզարի» մեկնությունը և դրանից բխած սխալ հետևությունը և մի շարք խաղ-երկիրությունների՝ «Դեյիշմե»-ների միջոցով մեկնաբանում աշուղական այդ ժանրի առանձնահատկությունները:

Իր մենագրության մեջ Պարույր Սևակը մեկ առ մեկ բացում-մեկնաբանում է Սայաթ-Նովայի ծննդյան թվականի, սիրած «յարի» ինքնության և այլ հարցերին առնչվող այլաքանություն-ծածկագրերը՝ ցույց տալով նաև թե՝ ժողովրդական բառ ու բանի, ժողովրդական դարձվածների, առած-ասացվածքների, «սրամիտ բառախաղ-կալամբուրների» ու ժողովրդական լեզվամտածողության այլնայլ դրսնորումների խորիմացությունը, թե միջնադարյան տաղերգուների ու գուսանաաշուղական արվեստի վերաբերյալ զիտելիքները զրականագիտական հետազոտության մեջ զարմանալի ձկուն մտածողությամբ ներդնելու կարողությունը:

¹⁷ Նույն տեղում, էջ 432-433:

¹⁸ Նույն տեղում, էջ 433:

¹⁹ Նույն տեղում, էջ 88:

Ժամանակի հրամայականի ու պահանջների մասին խոսելիս Պ. Սևակը հաճախակի է հիշեցնում «Աստծունը՝ աստծուն, կեսարինը՝ կեսարին» ասույթը:

Սայաթ-Նովայի եռալեզու ստեղծագործություններին այդ տեսանկյունից նայելով՝ Սևակը գտնում էր, որ նա ևս բոլոր մեծերի նման չէր կարող սուրբ շտալ ժամանակի պահանջներին:

«Փոշոտված, վաղուց մաշված» բառեր օգտագործելու համար նա ոչ թե քննադատում է Սայաթ-Նովային, այլ փորձում է աշուղ-բանաստեղծի ապրած ժամանակաշրջանի տեսանկյունից մոտենալ հարցին: Նշելով, որ «Դուանըտ զամ ուխտ» արտահայտությամբ է լեցուն մեր ողջ միջնադարյան տաղերգությունը (ինչպես նաև բանահյուսությունը), Պ. Սևակը արդարացնում է «հանձարեղ հանկարծախոսին» (Գ. Արսենի աշուղիսներում նրա՝ ուսորի վրա ստեղծագործելու պարագան (պատրաստի հանգ, մակղիրներ, համեմատություններ, պատկերներ), որ շատերն էին գործածել, «զի ի պաշտոնե նա ոչ թե բանաստեղծ էր, այլ աշուղ»²⁰:

Սայաթ-Նովային ներկայացնելով աշուղական արվեստից բանաստեղծական արվեստ տանող ճանապարհի վերջին հանգրվանում՝ Պ. Սևակը նրան առանձնացնում է միջնադարի և հետմիջնադարի մյուս աշուղներից՝ իբրև անձնական սիրո ու տառապանքի, ճշմարտության ու արդարության, բարու ու գեղեցիկի ինքնատիպ բանաստեղծական վերարտադրողի:

Պարույր Սևակը փորձում էր իր գրչակից ընկերներից շատերին, և հասկապես սկսնակ գրողներին հասկացնել, որ «աշուղության դարն անցել է», որ իսկական պոեզիան կարողանան զանազանել «սազանդարությունից», որովհետև «մարդիկ աշուղ են դարձել իրենց շնորհի շնորհիլ (բառախաղ չհամարեք), բայց նաև իրենց անգրագիտության (հաճախ էլ իրենց կուրության) պատճառով»:

Դիտողությունների հետ գնահատելով Վահե Հովակիմյանի ստեղծագործությունները՝ Պ. Սևակը 1963 թվականին անզամ իր անհանգստությունն էր հայտնում պոեզիայի բնագավառում սունկի պես աճող «աշուղների» առկայության փաստի կապակցությամբ. «...Եվ պատասխանից երևում է, որ նա այնտեղից չեւ, ուր բազմանում են աշուղները, ինչպես սունկերը կտրված ծառաքնի շուրջ... Ուստի և բնական շնորհը նրան մղում է դառնալու բանաստեղծ և ոչ թե աշուղ, քան ներորդ դարի կեսերի աշուղ՝ կոստյումավոր, փողկապավոր, դիպումավոր, երկու աչքն էլ տեղը, առանց սազի ու քամանչայի, բայց... էլի աշուղ» (V, 189):

Նույն 1963 թ., Գևորգ Էմինի «Այս տարիքում» ժողովածուի հրատարակության կապակցությամբ գրած գրախոսականում՝ Պ. Սևակը կրկին անդրադառնում է պոեզիայում «աշուղությանն» ու «սազանդարությանը» իբրև ուշագածության, հետամնացության ու կեղծ ժողովրդայնության խորհրդանիշի:

Նա արժեքավորում է «ժամանակին և ժամանակից» ծնված Էմինի քնարերգությունը՝ կանգ առնելով բանաստեղծի ավելորդ նկարագրություններից զերծ

²⁰ Նույն տեղում, էջ 386:

«սազր թմկաբերդն առավ» արտահայտության վրա, «...որպեսզի նախ և առաջ (թերեւս ավելորդաբար) հիշեցնեմ, որ «սագ» բառն այստեղ հոմանիշ է «արվեստին» ընդհանրապես, պոեզիային՝ մասնավորապես, և ապա՝ վկայեմ, որ Գ. Էմինը կյանքում ոչ մի երգ չի ասել այն «սագի» վրա, որ արդեն միայն նվազարան չէ, այլ խորհրդանիշ ուշացած աշուղության ու սուս ժողովրդայինի, մզլահու պահպանողականության ու բորբոսնած հետամնացության» (V, 215):

Որպես պոեզիայի առաջընթացը պայմանավորող երևույթ, գնահատելով Գևորգ Էմինի գիրքը, Պ. Սևակը գտնում է, որ այն գրական երիտասարդության համար կարող է ուղենիշ և խրատ հանդիսանալ, «մի խրատ, որ մեր ժողովրդի խոսքով ասած պիտի ականջին օդ դարձնել, մի խրատ, որ Էմինի փոխարեն ես կուգենայի ձևակերպել այսպես»:

(Եթե ճիշտ է, որ կրկնությունը գիտության մայրն է, ապա առավել ճիշտ է, որ կրկնությունը գրականության մահն է» (V, 216):

Ի հակադրություն «աշուղանաղլական-թոնրատնային» գրականության՝ դարին համընթաց քայլելու և համաշխարհային գրականության չափանիշներից ետ չմնալու համար Պարույր Սևակը դեռևս 40-ականների սկզբներին առաջ էր քաշում սիմֆոնիկ՝ համանվազային պոեզիա ստեղծելու անհրաժեշտության խնդիրը: Հետազայում նա, ավելի խորացնելով և հաստատելով իր դիրքորոշումը, գտնում էր, որ բազմաձայնությունն ու համանվազայնությունը պետք է դրսուրվեին չափածոյի բոլոր ժանրերում, անկախ ծավալից, թեմայից ու նյութի տարրողությունից, նույնիսկ՝ «10-15 տողանոց բանաստեղծության մեջ» (V, 258):

Իսկ նման պարագաներում ինչպես վերաբերվել ժողովրդական հյութեղ լեզվամտածողության ու ժողովրդական բանահյուտության հետ: Համարել դրանք գրավոր գրականության ստեղծման, ձևավորման ու զարգացման ձանապարհին իրենց նշանակալից ներդրումն արդեն կատարած-ավարտած գործոններ, նոր ժամանակների գրականության պահանջներն այլևս չքավարարող ու նրա առաջընթացը կաշկանդող միջոցներ, թե՝ անհրաժեշտ էր մտածել մոտեցման նոր ձևերի ու եղանակների մասին:

Ինչ ձևեր ու մեթոդներ էր որ կիրառվեն, միևնույն է, անկախ ժամանակներից գրողը պետք է ձգտի հասնել այն բանին, որ ժողովուրդ (մարդ (գրականություն համատեքստում շահի ինքը մարդը:

Պարույր Սևակի բանագիտական հայացքների հետ կապված այս հարցադրումների պատասխաններն առավել հստակ և ընդգրկուն ձևակերպումներով են արտահայտվել նրա ուշ շրջանի տեսական-քննադատական հողվածներում, նաև ակներում ու հարցագրույցներում:

Եթե վաղ շրջանի գործերում ժողովրդական բանարվեստին ու լեզվամտածողությանը վերաբերող անդրադարձումները դրսենորվում էին առանձին դեպքերում միայն կապված քննության առարկա նյութի հետ, ապա 60-ականների սկզբներից նկատելի է թե՝ այդ անդրադարձումների բանաստեղծական դրսենումները՝ որպես հավատող հանգանակներ, թե՝ դրանց հետ առնչվող տեսա-

կան ծավալուն հողված-մեկնարանությունները՝ իբրև պոեզիայի առաջընթացը պայմանավորող գործոն-ուղենիշեր:

1965 թ. «Գրական թերթ»-ում տպագրված Վահագն Դավթյանի «Ժամանակակից պոեզիան և ռեալիզմի նախահիմքերը» հողվածը մեծ աղմուկ հանեց, որին արձագանքեցին մի շարք գրողներ ու գրականագետներ:

Հողվածում հեղինակը մեջբերում էր Մարտիրոս Սարյանի՝ ռեալիզմի նախահիմքերին հասնելու մի ձևակերպում, ըստ որի «հասարակ միջոցներով, ամեն տեսակի ծանրաբեռնումից ազատվելով»՝ հնարավոր է հասնել առավելագույն արտահայտչականության: Այնուհետև Վահագն Դավթյանը Սիամանթոյի, Վարուժանի, Լորկայի, Տերյանի, Սևակի, Զարյանի օրինակներով ցույց է տալիս այն ուղին, որով պետք է ընթանար հայ քնարերգությունը:

Բնականարար, Պ. Սևակը ևս չէր կարող անմասն մնալ այդ բանավեճից: Դավթյանի առաջադրած հարցերին նա անմիջապես արձագանքում է «Հանուն և ընդդեմ «ռեալիզմի նախահիմքերի» հողվածով, որտեղ հեղինակը պաշտպանում է առաջադրած հարցերի արդիականությունը, հրատապությունն ու մատնանշած ուղին (այսինքն՝ խոսում է «հանունի» դիրքերից), ներկայացնում է նաև ժամանակակից պոեզիայի խնդիրներից բխող իր մտորումներն ու մտահոգությունները՝ առաջադրելով «ռեալիզմի նախահիմքերին» հասնելու սեփական տեսակետը, այն ճշմարիտ ուղին, որով ընթանալու էր XX դարավերջի հայ պոեզիան (այսինքն՝ խոսում է «ընդդեմ» ի դիրքերից):

Ոռեզիայի խնդիրներին վերաբերող մի շարք այլ հարցերի հետ Սևակն այդ հողվածում անդրադարձել է նաև ժողովրդական բանավոր ստեղծագործության և զեղարքեստական գրականության փոխառնչության հարցերին:

Հաղորդակցությունը հայ և համաշխարհային գրականության մեծերի ստեղծագործություններին Պ. Սևակին բերել էր այն համոզման, որ ամեն մի իսկական գրող, ելնելով ժամանակի պահանջներից ու խնդիրներից, պետք է ունենա ազգային ավանդներից օգտվելու, ժողովրդայնության հասնելու, լեզուն պարզության ու մատչելիության հասցնելու իր բանալին:

Վերջին հարցագրույցներից մեկում՝ «Ինչ-ը, ինչպես-ը և որպես-ը»-ում, Պարույր Սևակը գրողի հաջողության ամենակարևոր նախապայմանը համարում է բովանդակության և ձևի ինչ-ի և ինչպես-ի, ինչպես նաև որպես-ի (վերջինիս տակ հասկանալով պատկերավոր մտածողությունը) շաղկապվածությունն ու ներդաշնակությունը (V, 388):

Իսկ ի նշ դերով են հանդես գալիս ժողովրդական բանավոր ստեղծագործությունները Պ. Սևակի գործերում և ինչո՞վ են նպաստում այդ եռամիասնությանը:

Ժողովրդական բանահյուսությունն իր տարատեսակներով ինքնին թեմա է՝ «ինչ», իսկ հեղինակի ստեղծագործության մեջ այն կարող է վերածվել ձևի՝ ինչ-պես-ի:

Եթե բանահյուսական ամրողական նյութն է դարձել Սևակի ստեղծագործության ատաղձը (ասենք՝ ավանդությունները՝ մանկական բանաստեղծութ-

յուններում), ապա այն հանդես է զալիս ինչ-ի դերով, իսկ դրանց մշակման ու մատուցման կերպը՝ ձեր, ինչպես-ն է:

Բայց երբ բանահյուսական նյութն ամբողջ գործի ատաղձը չէ, այլ նրա մի մասը միայն, երբեմն էլ՝ հապանցիկ անդրադարձով, ապա միշտով փոքր թեման, սուկ ազդակ է հանդիսանում ասելիքը տեղ հասցնելու համար:

Դ. Սևակի մի շարք գործերում (ասենք՝ «Անլոելի զանգակատուն» և «Երգ երգոց») Կոմիտասի կյանքի, հայ ժողովրդի համար վճռորոշ դեր խաղացած 70-ամյա պատմության և սիրո թեմաներն արտահայտված են «Անլոելիում»՝ ժողովրդական երգերի, վիազերգերի, դյուցազներգությունների, առած-ասացվածքների, ժողովրդական դարձվածների և ազգագրական ու ժողովրդական լեզվամտածողության տարաբնույթ դրսորումներով, իսկ «Երգ երգոց»-ում՝ Սուլր գրքի միջոցով մեզ ավանդված վաղնջական բանաստեղծական գոհարներից մեկի՝ Սողոմոնի «Երգ երգոց»-ի թեմատիկ, կառուցվածքային ու պատկերային զանազան միջոցների կիրառմամբ: Այսինքն՝ նրանք առանձին վերցրած թեմա՝ «ինչ»-են, բայց կոնկրետ դեպքում հանդես են զալիս «ինչպես»-ի ձևի դերով:

Նման պարագայում բանաստեղծի առաջ կրկին հարց է առաջանում՝ ինչպես և ներկայացնել «ինչպես»-ով հանդես եկող բանահյուսական ստեղծագործությունը (ենթադրենք՝ ժողովրդական երգը), որն առանձին վերցրած ինքնին «ինչ» է:

«Անլոելի զանգակատուն» պոեմում այդ «ինչ»-ը՝ ժողովրդական երգը, ոչ թե ներկայացվում է ամբողջությամբ, այլ դրան բնորոշող որևէ հատվածով, երբեմն էլ՝ կրկներգով: Ժողովրդական երգը, բանաստեղծի խոստվանությամբ, օգնել է պոեմի կառուցվածքի ստեղծմանը՝ «քառ կոմիտայան երգերի, այսինքն՝ շարադրել Կոմիտասի ողջ կյանքը բատ նրա համապատասխան երգերի. երբ որք է՝ «Անտունի», եթե պանդոխտ է՝ «Կոռունկ», եթե սիրո մասին է՝ «Սոնա յար»...»²¹:

«Անլոելի զանգակատուն»-ում բանահյուսական նյութի ինչ ↔ ինչպես ↔ ինչ ↔ ինչպես-ով ներկայացված բազմակապ փոխկապակցվածության ներդաշնակ լուծումով է Դ. Սևակը հասնում իր նպատակին՝ սեփական «որպես»-ին՝ ստեղծելով «հերիաթանաղլական» շարադրանքից զերծ, ինքնատիպ կառուցվածքով ու մնածողությամբ պոեմի նոր տեսակ:

Կոմիտասի ծննդյան 100-ամյակին նվիրված հանդիսությունների օրերին «Գարուն» ամսագիրը «Իմ Կոմիտասը» խորագրով հարցազրույց է վարում ձանաշված մտավորականների հետ: Այն հարցին, թե ի՞նչ կարող է ասել Պ. Սևակը Կոմիտաս բանաստեղծի մասին, նա այսպես է պատասխանում. «Շատ ուշ, իմացանք Կոմիտաս բանաստեղծի մասին: Եվ շատերը զարմացան, իսկ ես բնավ: Նախ այն պատճառով, որ «եթե Աստված տվեց, ել չի հարցնում չափը»: Կոմիտասն այդ աստվածատուրներից էր, և բնավ զարմանալու բան չկա, որ Աստված նրան տվել էր նաև բանաստեղծելու շնորհ:

²¹ ՊԲՀ, 1973, № 1, էջ 71-83:

Զարմացանակ այն պատճառով, որ քաջածանոթ էի «Հազար ու մի խաղի» այն երկու պրակին, որ ժամանակին հրատարակել էին Մ. Արենյանն ու Կոմիտասը²²: Անկարելի է չինել բանաստեղծ և բազմաթիվ տարբերակներից ընտրել այն տողերն ու բառերը կամ անել այն շտկումները, որ կատարված է այդ պրակներում՝ ժողովրդական հումեփի նյութի համեմատությամբ»:

Պատասխանից հետեւում է, թե ինչպիսի վիրիարի աշխատանք է կատարել

Պ. Սևակը «Անլոելի զանգակատունը» գրելուց առաջ:

«Անլոելիի» հաղթահանդեսի հիմնական «մեղավորները» ընտրած նյութը, դրան առնչվող մանրակրկիտ աշխատանքն ու այն մատուցելու սևակյան ինքնատիպ լեզվամտածողությունն էին:

Թե՛ իր թեմատիկայով, թե՛ այն ներկայացնելու ձևով «Անլոելի զանգակատունը» ասես մի հրաբուխ էր, որ ժայռքեց ու խաթարեց պոեմի ժանրը բնորոշող ավանդական բոլոր ձևակերպումները:

«Անլոելիից» հետո մեծ ժողովրդականություն վայելող Պ. Սևակը «Մարդը ափի մեջ» ժողովածուով արդեն «հուսախար» էր արել իր ընթերցողներից շատերին ու որոշ գրականագետների: Վերջիններիս հուսախարությունն է լ ավելի է խորանում «Հանուն և ընդդեմ «ռեալիզմի նախահիմքերի» հոդվածը տպագրվելուց հետո, որոնք ժողովրդայնության չափանիշ էին ընդունում ֆոլկլորայնությանը և ժողովրդական լեզվամտածողությանը գերակայություն տալլը:

Իր ողջ ստեղծագործական կյանքում Պ. Սևակը միշտ հավատարիմ մնաց ճշմարտությանը ծառայելու և երբեք նրան չղավաճանելու սկզբունքին:

Բանահյուսությունից օգտվելիս ևս այն պետք է դառնար այդ սկզբունքը հաստատելու, ասելիքը, անկեղծ խոսքը տեղ հասցնելու միջոց, ձև և ոչ թե ժողովրդական նյութով ու խոսքով այդ նույն ժողովրդին սիրաշահելու նպատակ: Միայն այդ ճանապարհով էր հնարավոր առաջ տանել ազգային գրականությունը և քայլել քաղաքակիրք ազգերի շարքերում:

Փույթ չէ, թե ժողովուրդն այդ պահին չէր հասկանա արվեստագետին: Նրա խնդիրն է բարձրացնել ժողովրդի մակարդակը և ոչ թե արվեստն իշեցնել մինչև «հանրամատչելիություն»:

Պ. Սևակը բերում է Թումանյանի օրինակը, ապացուցելու, որ արվեստագետի մեծությունը ոչ «ծափաքանակով է որոշվում և ոչ էլ տպաքանակով»:

«Նույնիսկ Թումանյանի պես բանաստեղծը ժողովրդից առաջ իր խոսքը չէր կարողանում ժողովրդին վերադառնել. նրա երկերի տպաքանակը 300-ից չէր անցնում, և դա այն ժամանակ, երբ «Ասլի և Քարամը» (թե՝ «Աշուղ Ղարիբը»-վախճանում եմ սիսալվել) սպառվում էր ունենալով այն ժամանակների համար առասպելական տպաքանակ՝ 17000» (V, 385-386):

Եկ եթե գրականության զալիքով մտահոգ բանաստեղծը գրում էր, թե չպետք է իջնել ժողովրդի մակարդակին, եթե գրում էր, թե հերիաթանաղլա-

²² Մ. Աբեղյան. Կոմիտաս (Հազար ու մի խաղ, Ժողովրդական երգարան, 1-ին հիսնյակ). Վաղարշապատ, 1903: Մ. Աբեղյան. Կոմիտաս (Հազար ու մի խաղ, Ժողովրդական երգարան, 2-րդ հիսնյակ). Վաղարշապատ, 1905:

կան պոեզիան, ֆոլկլորային մտածողությունը անհարի են արդի մարդու մտածողությանը, նեղացողը ժողովուրդը չէր, այլ ժամանակի բռնի նեղացված մտածողությունը և հնից դժվարությամբ հրաժարվելու, նորը, անտվորը սվին-ներով դիմավորելու ավանդական տիտուր ստվորությը:

Գրողի մեծությունը և նրա ստեղծագործությունների հարատեղությունը ոչ թե ավանդականին, այլ իր ժողովրդի դարավոր ավանդներին հավատարիմ մնալով է պայմանավորված: Նա չպետք է դառնա ավանդականի հավատարմատարն ու գերին, այլ տեր ու տիրակալը, «մեծագույն ավանդախախտը»:

Այդ առումով, Պ. Սևակն, իբրև անգերազանցելի օրինակ, կրկին մատնանշում է Ամենայն հայոց բանաստեղծին. «...Թումանյանն է անգերազանց մշակելով մի-մի զլուխզործոց դարձրել մեր ժողովրդական բազմաթիվ ավանդությունները՝ զրական բազմապիսի սեռերով..., որքան էլ բառախալային թվա, Թումանյանը դարձավ ավանդախախտ՝ նախ և առաջ հենց ավանդությունները զրականություն դարձնելով» (Վ, 361-362):

Պ. Սևակի «Հանուն և ընդդեմ «ռեալիզմի նախահիմքերի» հոդվածը ևս բուռն քննարկումների տեղիք տվեց: Միաժամանակ հոդվածը պատճառ դարձավ նաև այն թյուր կարծիքն ստեղծելու, թէ իրը հակասություն է նկատվում Պարույր Սևակի տեսական հայացքների և պոեզիայում դրանց կիրառությունների միջև, և չնայած իր ստեղծագործություններում նա առատորեն օգտվում է ժողովրդական բանահյուսությունից, այնուամենայնիվ, տեսականորեն իրը կոչ է անում հրաժարվել այդ նույն սկզբունքից. «Ավելացնենք նաև, որ, հակառակ իր տեսակետների, նրա պոեզիայում, երբեմն առանձնանալով, նուրբ ու զուլալ է հիշում հինավուրց սրբնար, այսինքն՝ հույզը, որ հաճախ, շատ հաճախ պոեմը հեղեղվում է հայ բանահյուսության զարդերով, ժողովրդական պայծառ մտածողությամբ, որ մինչև անզամ կենցաղի հինավուրց պատկերներն իրենց արժանի տեղն ունեն պոեմում...Եվ այդ լավ է, շատ լավ, որ բանաստեղծ Սևակը ցախօախում է քննադատ Սևակի գծած սիեմաներով»²³:

«Ինչ-ը, ինչպես-ը, որպես-ը» (V, 388) հարցազրոյցում բանաստեղծը իր դգորհությունն է հայտնում հողվածում արտահայտած իր մտքերը ձիշտ շիականալու կապակցությամբ: «Առհասարակ իմ այդ հողվածը ձիշտ կարդացողների թիվը շատ քիչ էր», (ցավով ասում է բանաստեղծը:

Համանվագային մտածողություն ունեցող ցանկացած ստեղծագործություն, ըստ Պարույր Սևակի, չպետք է նմանվի «խաղիկ-ջանգուլումների բազմահարկությանը», ասել է թե՝ «քառասողերի, տների զարգացում չունեցող այնպիսի մի երգի, «որի եղանակը վերջանում է առաջին իսկ տնով (հետագա տների խոսքերն են փոխվում, իսկ եղանակն ու կրկներգը մնում են նույնը), այլ (պետք է նմանվի – Ա. Ա.) մի երգի, որի յուրաքանչյուր տունը նախորդ տան եղանակը փոփոխվում է ու զարգացնում բոլորովին այլ ձևերով» (V, 259):

Համանվագյին մտածողությամբ զրականություն ստեղծելու անհրաժեշտությունը ժամանակի պահանջն էր, XX դարավերջի զարգացած մտածող ընթերցողի պահանջը, որին անհերթեթություն էր այլևս զոհացնել ֆոլկորային

²³ Հ. Թ ա մ ր ա զ լ ա ն. Պոկիան պատմության քառությիներում. Երևան, 1971, էջ 222:

մտածելակերպով, այսինքն՝ «պատմողական-նկարագրական»՝ «հերիաթանալական» շարադրանքով՝ «դրա տակ հասկանալով ամենանախնականը վատ իմաստով, ամենապարզունակը վատ իմաստով, ամենաանհավանականը և մտացածինը... ինչը ըստ Էության արդեն կապ չունի բանահյուսության հետ, այլ այն հետամնացածության, այլ այն խեղճ ու կրակ մտածողության, որ ես կոչել եմ ֆոլկլորային մտածողություն...» (V, 404):

Իր այս վերջին հարցագրույցում Պ. Սևակը ստիպված էր էլ ավելի հստակեցնել ու բոլոր չհասկացողներին անզամ հասկանալի դարձնել 5 տարի շարունակ վեճերի տեղիք տփած հոդվածում իր արտահայտած մտքերը. «Ուրեմն իմ խոսքը եղել է ոչ թե բանահյուսական նյութը օգտագործելու կամ չվերամշակելու մասին: Առանձնապես իմ կյանքի մեծագույն նպատակներից մեկն է երբիցեւ վերամշակել «Սասնա ծոկը»՝ ի մ հասկացողությամբ և ի մ բմբոնումով: Խոսքն այն մասին է, որ եթե բանահյուսական մշակում է, ապա դա պետք է լինի ոչ թե պարզ վերաշարադրանք, կամ լավագույն-երազելի դեպքում՝ վերափոխություն, այլ վերաստեղծում, ոչ թե ոճավորում, այլ վերահմաստավորում» (V, 404):

Փաստորեն, Պարույր Սևակը ոչ թե դեմ էր բանահյուսական նյութն օգտագործելու երևույթին, այլ դրանից օգտվելու ձևին, մատուցվող նյութի հերիաթատիպ շարադրանքին՝ համեմված անհավանական պատմություններով ու ավելորդախոսություններով, շարադրված պարզունակ ոճով: Նման պարագայում ստեղծագործությունը նմանվում է հերիաթի, իսկ ստեղծագործողը՝ հերիաթասացի:

Եվ «հարաբերականության տեսության աղը ծամած, քվանթային տեսությունը համտեսած, կիրեռնետիկայի կոկորդը սղոցած ընթերցողի» անունից Պարույր Սևակը իրեն իրավունք է վերապահում նման գրական մշակներին սթափության կոչելու, քանի որ, անկախ թեմայից, ընդգրկած ժամանակից ու արծարծած գաղափարից, նրանք «գրական լեզվով պատմում են մի անձայրածիր հերիաթ՝ մոռանալով, որ մենք երեխս չենք և կարող ենք հարցնել. «Քեոի, բա այդպես լինո՞ւմ է»: Ահա հենց սա է, որ ես կոչում եմ ֆոլկլորային մտածողություն» (V, 405):

Հենց այս երևույթը հաշվի առնելով էլ Պ. Սևակն իր այդ հոդվածում առաջ էր քաշում բանահյուսական նյութն օգտագործելիս ստեղծագործաբար մոտենալու սկզբունքը, ժամանակակից պոեզիայի իրատապ պահանջներից բխող մի շարք խնդիրներ, որոնք ազդակ կարող էին հանդիսանալ ազգային պոեզիան միջազգայինի մակարդակին բարձրացնելու ձանապարհին:

Այդ ձանապարհը հայրահարելու միջոցներից մեկն էլ, բանաստեղծի բառերով ասած, «նամակայնությունից» «կեսխոսքայնությանն» անցնելու կարողությունն է:

«Եթե «հին» բանաստեղծությունը նման է հեռվից գրված նամակի (ուստի և նկարագրական, մանրամասն, ամեն ինչ պարզ և մինչև վերջ բացատրված),՝ գրում է Պ. Սևակը Վահե Հովակիմյանին հասցեագրված նամակներից մեկում (V, 419),՝ ապա «նոր» պոեզիան պիտի նման լինի (ուշացած հայերիս համար

պիտի, իսկ ընդհանրապես՝ նման է) երկու մտերիմների, շա և մտերիմների խոսակցության, այնպիսի մտերիմների, ՈՐՈՆՔ ԻՐԱՄ ՀԱՍԿԱՆՈՒՄ ԵՆ ԿԵՍ ԽՈՍՔԻՑ ԿԱՍ ՄԻ ԱԿՆԱՐԿՈՎ ՄԻԱՅՆ, ուստի և նրանց համար ոչ միայն ավելորդ, այլև ծիծաղելի է իրար բացատրել բաներ, որոնք վաղուց գիտեն, ասել բաներ, որոնց կարիքը չունեն, անել բաներ, որոնք նույնքան ավելորդ ու ծիծաղելի են, ինչպես, դիցուք, իրար ձեռք տալն ու անուն ասելը այն ժամանակ, երբ իրենք ոչ միայն տարիների ծանոթներ են, այլ նաև տարիների մտերիմներ...»: Ուստի և «նոր պոեզիան «չասվածքների պոեզիա է, ոչ թե զծի, այլ կետ զծի (պոնկտիր-ի) պոեզիա...» (VI, 419):

Գրողը կոչված է օգտագործել ժողովրդականը, ազգայինը և միենույն ժամանակ այն ծառայեցնել այդ նույն ժողովրդի գիտակցական ու մտածողական մակարդակի բարձրացմանը, հղկել նրա ճաշակը, նոր ճաշակ ներշնչել:

«Ճիշտ է, որ ժողովուրդն է բոլոր բարիքների ստեղծողը, - գրում է Պ. Սեակը, - ամեն բան նրանից է զայիս, ամեն բան նա է տայիս, բացի թերևս... ճաշակից: Արվեստի մեջ առաջնորդվել ժողովրդի ճաշակով՝ նշանակում է չծառայել ժողովրդին, որովհետև արվեստագետը, որ նույն ժողովրդի զավակն է, ժողովրդի հանդեպ ամենից առաջ ունի մեկ պարտավորություն՝ նրա ունեցած ճաշակը հղկել, նոր ճաշակ ներշնչել նրան: Արվեստագետի սրբազն պարտքն է բոլոր հնարավոր միջոցներով ժողովրդին բարձրացնել դեպի արվեստը և ոչ թե արվեստն իջեցնել միայն ժողովրդի մակարդակը:»

Արվեստը ինչքան էլ առաձգական լինի, - շարունակում է իր միտքը խորացնել բանաստեղծը, - չի կարելի ձգել, ձգձգել մինչև հանրամատչելիություն: Այս դեպքում նա կկտրվի, այսինքն՝ կղաղաքի արվեստ լինելուց: Եվ ճշմարիտ արվեստագետները չեն կարող նմանվել այն ձկների վտառին, որ հետևում է լողացող նավին: Դելֆինն էլ է ձուկ, բայց նա ճիշտ լողում է նավի առջևից: Արվեստագետը դեկին պիտի լինի» (VI, 386-387):

Բանաստեղծին ուղղած այն հարցին, թե ի՞նչ տեղ կարող է գրավել ժողովրդական բանահյուսությունը ժամանակակից բանաստեղծի ստեղծագործությունների մեջ, և ի՞նչ պիտի անի բանաստեղծը, որպեսզի բանահյուսությունից կատարած նրա մշակումը դառնա ստեղծագործական, Պ. Սեակը պատասխանում է. «Ամեն ժողովուրդ, որ չի ոչնչացել իր զարգացման նախնական աստիճանի վրա, չի կարող իր գոյության հետագա բոլոր դարերում չօգտվել իր բանահյուսական նյութից ու մտածողությունից, որովհետև այդ նյութն ու մտածողությունը շարունակում են ապրել ոչ միայն և ոչ այնքան ինքնարբավորեն, որքան իբրև լեզու, իբրև ազգային մտածողություն և ժողովրդական հոգերանություն...» (V, 403-404):

Պ. Սեակը ժողովրդական բանահյուսությունից օգտվելիս խորհուրդ է տալիս առաջնորդվել հետևյալ դրույթներով՝

ա) եթե բանահյուսական մշակում է, ապա այն պետք է դուրս գա վերաշրադրանքի, լավագույն դեպքում՝ վերափոխության շրջանակներից:

բ) գրողը պետք է բանահյուսական նյութը ոչ թե ոճավորի, այլ վերստեղծի ու վերափոխավորի,

զ) թեմայի ընտրությունը պեսք է պայմանավորի տվյալ ստեղծագործության ձևը,

դ) քանի որ ժամանակակից պոեզիան բարդ ու խորիմաստ, տիեզերագնացության ու ասումային դարի ընթերցողի մտածողության պահանջներից բխող «կեսխոսքային, կետ-գծային» պոեզիա է, ապա բանաստեղծի համար նյութի օգտագործման աղբյուր կարող են դառնալ ժողովրդական բանահյուսական ստեղծագործությունների մասնակի կիրառությունները, դրանց դարձվածային դրսորումներն ու բանաձևային խոտացված պատկերավոր արտահայտությունները:

Պարույր Սևակը կողմնակից էր ոչ թե բանահյուսական նյութի պարզունակ վերաշարադրանքին, այլ վերահմաստավորմանը, ոչ թե սովորական վերափոխությանը, այլ վերառմավորմանը, վերաստեղծմանը: Այլապես գեղարվեստական ստեղծագործությունը պատմողական-նկարագրական (որը նույն է, թե՝ հերիաֆանաղլական) շարադրանքի սահմաններից դուրս գալ չէր կարող:

Բանահյուսության հանդեպ այս յուրովի մոտեցումն, անշուշտ, բխում էր արդի գրականության հրատապ պահանջներից:

Մինչև իր կյանքի ողբերգական տարին **Պ. Սևակը** բազմաթիվ հոդված-ուսումնասիրություններով, հավաստ հանգանակներով ու չափածո խոսքով պատասխան էր տալիս ժողովրդական բանահյուսությունը մերժելու բանաստեղծին ուղղված անհիմն մեղադրանքներին:

Ա. Ղանալանյանի «Ավանդապատումին» նվիրված իր գրախոսականում²⁴ **Պ. Սևակը** բարձր է գնահատում մերօրյա «հացթուխի» կատարած շնորհակալ աշխատանքը՝ նրան համարելով արդի հայ բանագիտության ամենակարկառուն դեմքը:

Հայ ժողովրդական աշխատանքային երգերի, առած-ասացվածքների, ավանդությունների համահավաքը կազմելուց ու դրանց վերաբերյալ գրած ուսումնասիրություններից զատ, Ղանալանյանը սերունդներին էր պարզել նաև Առաջանի և Ավանդապատում հրաշալի անվանումները:

Պարույր Սևակն իր գնահատանքի խոսքն է ուղղում բազմավաստակ գիտնականի նախորդ՝ 1951 թ. հրատարակված «Առածնի» ժողովածուի կապակցությամբ, որը լրացնում էր «մեր բանագիտության այն բացը, որ դարձել էր այլևս անտանելի, որովհետև... Էլ ի՞նչ ժողովուրդ (և այն էլ՝ հինավոր որ ժողովուրդ), որ չունի իր առածների և ասացվածքների համահավաք ժողովածուն» (V, 380):

Պարույր Սևակը գրախոսականում մեջ է բերում նաև Մանուկ Արելյանի խոսքերը կապված վիպական բանահյուսության դեռևս չուտումնասիրված բնագավառներից մեկի՝ պատմական, կրոնական, բարոյակրթական գրույցի ու պատմական ավանդության ուսումնասիրության անհրաժեշտության հետ:

Պ. Սևակը համոզված էր, որ «...մեր գրադարաններում «Ավանդապատումը» դրվելու է «Սասնա ծոերի», «Ժողովրդական խաղիկների», «Գուսանական ժողովրդական երգերի», «Առածնիի» կողքին» (V, 380):

²⁴ «Գրական թերթ», 16.01.1970:

Եթե բանահյուսությանն առնչվող առաջին գրախոսականը սոսկ կատարված աշխատանքի փաստարկում է, ապա սույն գրախոսականում Պ. Սևակը, ելնելով ընթերցողի իմացական մակարդակի բարձրացման ու խորացման մտահոգությունից, արտահայտում է իր կարծիք-առաջարկը՝ կապված կեղծ կամ ժողովրդական ստուգաբանությունների հետ:

«Շատ ավելի օգտակար կլիներ,- գրում է բանաստեղծը,- եթե Ա. Ղանալանյանն Առիթն ՕԳՏԱԳՈՐԾԵՐ և կեղծ կամ ժողովրդական ստուգաբանությունների կողքին տար դրանց ՆԱԵՎ գիտական ստուգաբանությունը: Դրանով մենք կշահեինք կրկնակի. նախ կիրաբանար մատուցվող նյութն ինքնին, ապա կբարձրանար ընթերցողի իմացական մակարդակը...» (V, 386):

Ամենայն էլ զարմանալի չէր, որ անվանի բանագետ Սարգիս Հարությունյանի «Մանուկ Արելյան» մենագրության դոկտորական դիսերտացիայի պաշտպանության ընդդիմախոս է նշանակվում հենց Պարույր Սևակը:

Գրականագիտության, բանագիտության և լեզվաբանության ասպարեզներում Ս. Արելյանի բեղուն գործունեության վերաբերյալ էլ ո՞վ կարող էր այդքան հիմնավոր իմացությամբ աչքի ընկնել, եթե ոչ մեծանուն գիտնականի շնորհաշատ ուսանողը:

19 ձեռագիր էցից բաղկացած Պ. Սևակի պատրաստած նախնական կարծիքում և պաշտոնական ընդդիմախոսության մեջ ոչ միայն հիմնավոր ու սկզբունքային գնահատական է տրվում պաշտպանության ներկայացված ատենախոսությանը, այլև գնահատանքի ու երախտիքի խոսք է հղվում իր մեծ ուսուցչապետին. «Ոչ միայն կարող ենք, այլև պարտավոր ենք հպարտությամբ նշելու, որ հայագիտության բոլոր մեծ երախտավորների մեջ առ այսօր Ս. Արելյանն է ամենաներդաշնակ, ավելի ճշգրիտ բառով ասած՝ կատարյալ դեմքը... Արելյանի մեջ ներդաշնակ կյանքով ապրում էին թե՝ մեծ լեզվաբանը, թե՝ մեծ գրականագետը, թե՝ մեծ բանագետը՝ իրենց արանքում տեղ տալով նաև մեծ պատմաբանին և մեծագույն տաղաչափագետին... Արելյանը հիմնադիր գիտնական է առնվազն չորս դպրոցի՝ հայ բանագիտության, հայ հին և միջնադարյան գրականության, հայոց լեզվի և հայոց տաղաչափության»:

Գնահատելով նաև մենագրության հեղինակին՝ որպես «մեր բանագիտության այն սակավաթիվ կարող ուժերից, որոնք շարունակում են մեծն Ս. Արելյանի գործը՝ կատարելով այն, ինչ թերի է մնացել», Պ. Սևակը միաժամանակ բանավիճում է և՝ իր ուսուցչապետի, և՝ հայոց կամառի իր գրչակից ընկերոջ ու բարեկամի հետ ոչ թե վիճարկելի համարելով, այլ մերժելով մեր էպոսի 1000-ամյակի կապակցությամբ 1939 թ. պատրաստած «Սասունցի Դավիթ» համակարգը բնագիրը՝ այն անվանելով ոչ լիարժեք գործ. «Մեր հանճարեղ էպոսն այնտեղ աղքատացել ու խեղճացել է վերնազրից սկսած. «Սասունցի Դավիթը» թեպետ մեր վեպի գիտավոր ճյուղն է, բայց և շատ է հեռու վեպի ողջ ծանրությունը կրելուց: Մեր վեպը Սասունա ծոերի մասին է և ոչ թե այդ ծոերից մեկի: Մեր վեպում կան նաև հանճարեղ կտորներ, դեպքեր, գեղարվեստական մանրութներ, որոնց բացակայությունը համահավաք բնագիրը զրկում է գիտական և գեղագիտական պատշաճ հեղինակությունից:

Ժամանակն այնպիսին էր, - իր ասելիքն է հիմնավորում բանաստեղծ զիտնականը, - որ նույնիսկ Ս. Արեդյանի նման անսասան ժայռը պիտի տեղի տար: Դրա համար այսօր ոչ որ Արեդյանին չի մեղադրում, բայց հանուն նույն Արեդյանի և ի սեր արեդյանականության մենք այսօր պարտավոր ենք հակարվելու համահավաք բնագրին և լրջորեն մտածելու հակառակ ուղղությամբ. Հայաստանի զիտությունների ակադեմիայի հասարակական զիտությունների բաժանմունքի առաջիկա լուրջ գործերից մեկը պիտի լինի «Սասնա ծուերի» նոր և լիարժեք բնագրի ստեղծումը»²⁵:

Բանագիտության ասպարեզում ձեռք բերած հիմնավոր զիտելիքները, հետազոտվող նյութի բազմակողմանի ուսումնասիրության և նրա տարաբնույթ կիրառության շրջանակները Պարույր Սևակի պոեզիան դարձրել են էլ ավելի խորքային, բազմաշերտ ու բազմաձայն՝ թարմ շունչ և ինքնատիպություն հաղորդելով նրա լեզվամտածողությանը:

ФОЛЬКЛОРОВЕДЧЕСКИЕ ВЗГЛЯДЫ ПАРУЙРА СЕВАКА

АՐՄԵՆ ԾԱՐԿԻՍՅԱՆ

Р е з ю м е

Фольклороведческие взгляды П. Севака начинают формироваться уже в период его учебы в Ереванском университете, а затем в Москве, в книге “Абоян и народная словесность”, в статье “Поэзия Варужана”. Более четко и глубоко они проявляются в работах Севака о средневековых поэтах Нарекаци, Кучаке, Саят-Нове, также в статье “За и против первооснов реализма” и в интервью “Что, как и каким образом?” Поэт “тонратнаин-сказочной” литературе противопоставляет симфоническую, многоголосную и глубокомысленную литературу,озвученную новым временем. П. Севак был сторонником не простого переложения фольклорного материала, а его переосмысления, воссоздания, иначе художественное произведение не выходит за пределы рассказочно-описательного изложения. При использовании фольклора П. Севак советует следовать следующим принципам:

- а) если это фольклорная обработка, то она должна выйти за рамки переложения;
- б) фольклорный материал писатель должен не стилизовать, а переосмыслить и воссоздать;
- в) выбор темы должен обуславливать форму данного произведения;
- г) поскольку современная поэзия—сложная и глубокомысленная, “пунктирная” поэзия, исходящая из мышления читателя космического и атомного века, для поэта источником использования материала могут стать лишь частичное употребление народного творчества, его фразеологические проявления, пословицы и поговорки.

Фундаментальные знания в области фольклора, широкие аспекты изучения темы и полное владение материалом сделали поэзию поэта-ученого многослойной, многоголосной и глубинной, придавая его языкомышлению свежее дыхание и своеобразие.

²⁵ Սարգիս Հարությունյանի «Սանուկ Արեդյան» դոկտորական դիսերտացիայի վերաբերյալ Պարույր Սևակի նախնական կարծիքը՝ 1 ձեռագիր էջ և ընդդիմախուսությունը՝ 18 ձեռագիր էջ, մեզ է տրամադրել վաստակաշատ բանագետ-հայագետը:

PARUYR SEVAK'S FOLK-LORE VIEWS

ARMEN SARGSYAN

S u m m a r y

The objective of the present paper is to reveal Paruyr Sevak's views on folk-lore study in the early period of his literary activities. The poet's views on folk-lore study were already formulated in his review of the book "Abovyan and Folk-lore" and in the article "Varujan's Poetry". Sevak's views on folk-lore study are more deeply and distinctly expressed in his works devoted to medieval poets Narekatsy, Kuchak and Sayat-Nova, as well as in the article "For and Against the Principles of Realism" and in the interview "What and How?". The poet opposes to the "fantastic" literature the symphonic, polyphonic and deeply perceived literature, which is in tune with the new times. Paruyr Sevak was for the work of literature which is re-created, re-perceived and not for the simple narration of folk-lore material. Otherwise, in his opinion, the piece of literature remains in the bounds of a narrative-descriptive exposition. Sevak advises to follow the principles:

- folk-lore treatment should exceed the limits of exposition;
- the writer should re-interpret and re-create the folk-lore material and not stylize it;
- the choice of the theme should make for the form of the work of literature;
- as the contemporary poetry is a complicated and profound "dotted" poetry, outgoing from the mentality of cosmic and atomic era, a source of the material for a poet to use can become only a part of folklore, its phraseological expressions, proverbs and sayings.

The fundamental knowledge of folk-lore, the deep study of the theme and the complete mastering of the material made the poetry of the poet-scientist very deep, many-sided and multi-layered, pouring fresh air into his thought and language.